

# Qalam

138, Sya'ban 1381, januari 1962, 60 sen.

## Mengurangkan Perceraian

Kesedaran umat Islam di bandar-bandar mengenai dengan banyaknya perceraian-perceraian di dalam maSharakat umat Islam telah timbul semenjak berbelas-belas tahun dahulu. Kesedaran-kesedaran ini timbul setelah melihat dan menatap daftar perceraian setiap tahun, terutamanya di bandar-bandar, angka-angka perceraian meningkat kepada angka hingga kadang-kadang lebih daripada 40 peratus daripada jumlah perkahwinan di dalam setahun ini.

Dengan kerana itu berbagai-bagai fikiran timbul kerananya.

Ada yang menyangka bahawa perbuatan sewenang-wenang telah terjadi iaitu seorang suami dengan mudah sahaja menggugurkan talak ke atas isterinya - dengan tidak sesuatu sebab yang munasabah. Sebab itu mustahak diadakan kawalan-kawalan supaya yang tercerai itu tidak teraniaya.

Ada pula yang memandang bahawa salah satu sebab perbuatan-perbuatan sewenang-wenang itu ialah mereka mencerai isterinya kerana hendak berkahwin dengan perempuan lain – sebab itu perkara itu mesti dibuat peraturannya supaya perbuatan sewenang-wenang itu tidak terjadi.

Bahkan ada pula di antaranya yang memandang bahawa salah satu sebabnya perceraian ialah kerana banyaknya orang-orang yang beristeri lebih daripada satu, dan perkara ini membawa kepada porak peranda berumahtangga dan banyak terjadi

perkara-perkara anjaya yang berlaku.

Untuk ini semuanya maka dari satu masa ke satunya, pihak cerdik pandai dan kerajaan-kerajaan tempatan mencari jalan bagaimana caranya mengurangkan perceraian itu. Ini adalah satu usaha dan tujuan yang patut dipuji asalkan ikhtiar-ikhtiar yang dijalanka dan diusahakan itu tidaklah ia kelak melanggar dasar-dasar hukum agama Islam di dalam hal kahwin dan cerai.

Untuk ini pula, sebelumnya, bagi mereka hendaklah lebih dahulu mengadakan penyelidikan yang saksama tentang keadaan yang terjadi. Melihat melihat keadaan itu dengan suatu penyelidikan sebelum mengadakan ikhtiar-ikhtiar bagaimana caranya mengadakan peraturan-peraturan nikah kahwin yang boleh mengurangkan angka-angka perceraian yang tidak bertentangan dengan dasar hukum-hukum agama Islam yang telah ada peraturan dan undang-undangnya yang lengkap di dalam perkara ini.

Pemecahan atas angka-angka sebab perceraian itu mesti dikaji. Berapa jenis sebab-sebab perceraian itu: kerana tidak cukup nafkah berapa, kerana isteri tidak taat berapa, kerana isteri menduakan suami berapa, kerana bermadu berapa, kerana isteri mandul berapa ( sebab hendak kahwin lagi), kerana kurang layanan berapa, kerana suami suka memukul berapa, kerana isteri tak endahkan suami berapa dan berbagai-bagai lagi sebab musabab yang wajib dikaji. Dengan angka-angka ini kelak dapat mengukur sebab-sebabnya dan dapat mengetahui penyakit-penyakitnya kemudian daripada itu baharulah dapat mencari jalan yang sebaik-baiknya supaya keadaan sempurna – seperti menarik rambut di dalam tepung, tepung tak berserak rambut tak putus.

Untuk ini, tentulah mengambil masa yang panjang tetapi dengan tidak mengapa sebab mustahak benar bagi kerajaan tempatan mengkaji persoalan itu dengan luas supaya

tidaklah kelak kalau peraturannya dibuat, tidak akan bertentangan dengan hukum agama dan tidaklah kelak akan ada orang yang berani atau cuba menentang peraturan itu sekiranya peraturan itu dibuat berlawanan dengan peraturan yang diluluskan oleh Allah dan Rasul-Nya.

Dengan kerana sebab-sebab inilah timbulnya hasrat mengadakan Mahkamah Shariah di Singapura ini, dan dengan kerana itulah timbulnya usaha-usaha dan suara-suara di lain-lain tempat untuk mengadakan peraturan-peraturan mengadil hal ehwal perkahwinan dan cerai – yang dahulunya dikelola oleh kadi-kadi yang diberi tugas hanya untuk mendaftarkan nikah kahwin dan cerai dan diberi kuasa mengeluarkan surat-suratnya kepada yang berkenaan.

Kita mengharap bahawa usaha kepada jalan itu tidaklah hendaknya dibuat berlawanan atau bertentangan dengan ajaran yang ditunjukkan oleh Islam atau ajaran yang telah ditetapkan oleh agama Islam.

Sepanjang yang kita ketahui, bahawa dua negeri yang telah mengadakan peraturan-peraturan baharu mengenai nikah dan cerai iaitu Singapura dan Selangor. Pada masa dahulu kita telah pernah mengupas dasar-dasar yang dijalankan tentang nikah dan cerai serta beristeri lebih daripada satu yang dikatakan dijalankan di Singapura. Tetapi kita tidak dapat naskah yang bertulis di dalam hal mengenai perkara yang tersebut. Bahasan kita itu, dengan secara tidak tepat telah disebut oleh Peguam Agung kerajaan Singapura yang menafikan adanya peraturan tersebut. Sekalipun hingga sekarang, masih menjadi sebutan bahawa tiap-tiap seorang suami tidak boleh menceraikan isterinya melainkan di hadapan kadi dan diatas persetujuan isteri itu sendiri, dan seorang suami tidak

boleh beristeri seorang lagi melainkan setelah mendapat persetujuan daripada isteri yang pertama. Sepanjang mana peraturan ini berjalan tidak kita ketahui – dan malangnya sekalipun telah menjadi buah mulut ramai tentang tidak senangnya peraturan-peraturan yang dikatakan dijalankan itu tidak seorang pun Ahli Dewan Undangan (orang Islam) yang mendapatkan pertanyaan di dalam persoalan itu supaya orang ramai mengetahui apakah sebenarnya undang-undang itu telah pun dijalankan itu tidak - sebab secara tepat perkara itu jika kita tidak salah telah dinafikan.

Tetapi ini berlainan bagi negeri Selangor. Di dalam Peraturan Nikah dan Cerai bagi negeri Selangor 95/60 di antara lain-lain di dalam peraturan itu ada menyebut berkenaan dengan perceraian itu seperti di bawah ini:

5. Perceraian : (1) Mulai dari 1 Julai

1960 yang lalu telah dikanunkan iaitu perceraian tiadalah boleh dilakukan di mana juu pun melainkan di hadapan kadi dengan memasukkan penyata-penyata mengikut perkara yang dikehendaki oleh Borang Perceraian 95/60 (5) yang telah disediakan.

(2) Dan cerai atau lafaz talak tiada boleh

digugurkan melainkan sesudah mendapat persetujuan dari pihak perempuan (isteri) dan kelulusan dari kadi, (dan bagi pihak kadi sebelumnya meluluskan perceraian itu terpaksa mengadakan perjumpaan memberi nasihat kedua-dua belah pihak supaya berdamai dan berbaik semula, dan setelahnya ia berpuashati atas sebab-sebab bercerai itu musabah dan tidak dapat diperbaiki lagi baharulah perceraian itu diluluskan.

6. Rujuk : Seseorang lelaki yang telah menceraikan isterinya bolehlah ia merujuk semula tetapi hendaklah dengan keredaan isterinya itu. Jika ia tidak reda

atas rujuk itu maka gugurlah talak satu.

Kemudian, pada bulan Disember tahun 1961

Yang Dipertua Jabatan Agama Selangor telah pun membuat kenyataan di dalam akhbar menyatakan bahawa barang siapa yang hendak beristeri satu lagi – selain daripada isteri yang ada (memadukan isterinya) maka hendaklah lebih dahulu mendapat persetujuan daripada isterinya yang pertama dan hendaklah disiasat kemampuannya dan kebolehan suami itu . Jika tidak disetujui oleh isteri yang pertama erti kadi tidak boleh mengkahwinkannya dan tidak dibenarkan didaftarkan.

Sepanjang pengetahuan kita bahawa kanun yang dijalankan ini adalah sama sekali bertentangan dengan undang-undang Sharak Islam. Kanun yang dijalankan oleh kerajaan Selangor ini adalah sangat berbahaya untuk keselamatan dan kebebasan agama.

Nampaknya cita-cita perbaikkan maSharakat yang dibuat itu tidak dijalankan dengan sewajarnya atau sepatutnya tetapi telah melanggar batas yang diluluskan oleh Sharak. Orang-orang hanya menerima hukuman itu dengan syarat bahawa hukuman itu tidak melanggar Sharak dan hukuman itu berjalan merata-merata jangan rakyat sahaja yang dikenakan hukuman sedang ke atas Orang Besar-Besar negeri didiamkan.

Perkara ini adalah suatu perkara besar, lebih besar daripada persoalan loteri kebajikan maSharakat. Kita berharap alim ulama akan memberi penjelasan-penjelasan yang terang dan nyata di dalam soalan ini disebabkan perkara ini ada kena mengena dengan hal ehwal kebersihan keturunan bagi umat Islam masa yang akan datang.

Alim ulama kita mesti ingat bahawa masa sekarang

ada banyak cerdik pandai kita yang mahu membuat khidmat untuk kebaikan maSharakat tetapi malangnya banyak di antara mereka yang kurang mendalam di dalam pengajian agamanya.

Kerana itu cita-cita mereka yang baik itu hendaklah kita bantu dengan mengingatkan bahawa janganlah hendaknya sesuatu yang dikanunkan itu melanggar undang-undang Sharak Islam.

Alim ulama wajib bekerja bersungguh-sungguh memberi penerangan dan penjelasan di dalam soalan ini.

Sebelumnya kita mengupas dengan panjang lebar di dalam persoalan ini di dalam majalah ini kita berharap alim ulama kita memberi pendapatnya di dalam soal undang-undang perkahwinan dan cerai yang berjalan kuatkuasanya di Selangor sebab ditakuti kelak undang-undang itu akan ditiru oleh lain-lain negeri.

### **Perkara Sarah Binti ‘Abdullah**

Di dalam Berita Harian muka hadapan dan bersama-sama hari itu di dalam Straits Times tersiar gambar seorang perempuan Melayu dan Islam bernama Sarah binti ‘Abdullah sedang berkucup dengan seorang yang bukan Islam, bernama Richard Cliff.

Apabila menatap siaran itu umumnya umat Islam terasa yang mereka telah disentuh apalagi dikatakan bahawa mereka berkucup itu sebagai satu nazar.

Adalah tidak menjadi suatu perkara luar biasa seorang perempuan, terutamanya perempuan yang hidup sebagai pelayan di kedai-kedai kopi, yang tidak berapa mengendahkan maruah dirinya, jauh sekali daripada menjaga maruah am, sebagai suatu contoh keadaan